



Broj/Број: 01/2a-50-1-2-4/07
Sarajevo/Сарајево, 27.03.2007.

ZAPISNIK

4. sjednice Komisije za vanjske poslove Zastupničkog doma Parlamentarne skupštine Bosne i Hercegovine, održane 27.03.2007, s početkom u 11 sati i 30 minuta

Četvrtu sjednicu Komisije za vanjske poslove Zastupničkog doma PSBiH otvorila je Azra Hadžiahmetović, prva zamjenica predsjedatelja Komisije.

Sjednici su prisustvovali sljedeći članovi Komisije: Milorad Živković, Azra Hadžiahmetović, Slavko Matić, Milica Marković, Azra Alajbegović, Husein Nanić, Sefer Halilović, te Merdžana Iglica – tajnik Komisije.

Odsutni su bili Sadik Ahmetović i Denis Bećirović, koji je svoje odsustvo opravdao na vrijeme.

Sjednici je prisustvovao pozvani gost i predstavnik predlagača general-pukovnik Sifet Podžić, načelnik Zajedničkog štaba Oružanih snaga BiH i savjetnik članova Predsjedništva BiH za vojna pitanja, te Nina Šandrk, savjetnik pri Programu podrške Parlamentu misije OSCE-a u BiH. Ispred Sektora za međunarodne odnose i protokol PSBiH, sjednici je prisustvovala Edina Hrnjić, a ispred Sektora za istraživanje PSBiH Nina Lakomica.

Zapisnik je vodila Merdžana Iglica, tajnik Komisije, Alma Salkić-Mijić iz Odjela za dokumentaciju i informacije PSBiH i student stažista, Maja Čvoro.

Za sjednicu je predložen sljedeći

DNEVNI RED

1. Usvajanje zapisnika 2. i 3. sjednice Komisije za vanjske poslove;
 2. Izbor predsjedatelja Komisije za vanjske poslove, umjesto dosadašnje predsjedateljice Borjane Krišto;
 3. Razmatranje inicijative Kluba SDS-a za rekonstrukciju Vijeća ministara BiH razrješenjem ministra vanjskih poslova BiH Svena Alkalaja;
 4. Usvajanje Radnog plana Komisije za vanjske poslove za 2007. godinu;
 5. Izbor delegacija Parlamentarne skupštine BiH u:
 - a) Parlamentarnu skupštinu Vijeća Evrope,
 - b) Organizaciju za evropsku sigurnost i suradnju (OSCE),
 - c) Interparlamentarnu grupu BiH pri Interparlamentarnoj uniji,
 - d) Centralnoevropsku inicijativu (CEI),
 - e) Parlamentarnu skupštinu NATO-a,
- sa prilogom u formi Radnog materijala Poslovnika o radu stalnih delegacija;

6. Izvještaj o učešću Oružanih snaga, policijskih i državnih službenika BiH u operacijama podrške miru za period 1.3.2006. - 31.8.2006. godine - podnosilac: Predsjedništvo BiH i Vijeće ministara BiH;
7. Odluka o produženju mandata jedinica Oružanih snaga BiH za uništavanje neeksplozivnih ubojitih sredstava (NUS) u operacijama podrške miru «Iračka sloboda» - podnosilac: Predsjedništvo BiH;
8. Obraćanje Ollia Rehna, evropskog komesara za proširenje, parlamentarcima BiH 16. marta 2007. godine;
9. Izvještaj s Konferencije predsjednika komisija za vanjske poslove parlamenta zemalja članica Evropske unije, Evropskog parlamenta i zemalja kandidata za prijem u članstvo EU (COFACC), održanoj u Berlinu, 26. i 27. 02. 2007. godine;
10. Tekuća pitanja.

Sjednicu je otvorila prva zamjenica predsjedatelja Komisije, Azra Hadžiahmetović. U uvodnoj riječi istakla je da Komisija za vanjske poslove po Poslovniku Zastupničkog doma PSBiH nije nadležna za pitanje rekonstrukcije Vijeća ministara BiH, a vezano za inicijativu Kluba SDS i smjenu ministra vanjskih poslova Svena Alkalaja. Ustvrdila je da je to nadležnost Ustavno-pravne komisije, ali je istakla da Komisija za vanjske poslove, ukoliko Zastupnički dom to od nje zatraži, može zauzeti određeni stav o tom pitanju. Takođe je za 5. tačku dnevnog reda obrazložila da Komisija za vanjske poslove nije nadležna da bira članove delegacija, ali može i treba razmatrati Prijedlog Poslovnika o radu stalnih delegacija, dati svoje prijedloge, sugestije i primjedbe ukoliko ih ima.

U raspravi o dnevnom redu Milorad Živković je predložio da se 2. tačka dnevnog reda dopuni i da se pored izbora predsjedatelja Komisije, glasa i o njegovom prijedlogu za izmjenu drugog zamjenika predsjedatelja Komisije za vanjske poslove. Azra Hadžiahmetović je predložila da se 3. tačka skine s dnevnog reda, a da se 2. tačka dopuni prijedlogom Milorada Živkovića.

Ovakav izmjenjeni i dopunjeni dnevni red usvojen je jednoglasno.

Ad.-1. Usvajanje zapisnika 2. i 3. sjednice Komisije za vanjske poslove

Zapisnik 2. i 3. sjednice je jednoglasno usvojen.

Ad.-2. Izbor predsjedatelja Komisije za vanjske poslove, umjesto dosadašnje predsjedateljke Borjane Krišto i izbor drugog zamjenika predsjedatelja Komisije za vanjske poslove umjesto dosadašnjeg Milorada Živkovića

Za predsjedatelja Komisije za vanjske poslove izabran je Slavko Matić sa pet glasova za i dva glasa suzdržana.

Na prijedlog Milorada Živkovića da se umjesto njega na mjesto drugog zamjenika predsjedatelja Komisije za vanjske poslove izabere Milica Marković, članovi Komisije su glasali i sa šest glasova za i jednim suzdržanim glasom izabrali Milicu Marković za drugu zamjenicu predsjedatelja Komisije.

Nakon ovoga je prva zamjenica predsjedatelja Komisije, Azra Hadžiahmetović, čestitala Slavku Matiću na izboru za predsjedatelja i zamolila ga da preuzme predsjedavanje sjednicom.

Ad.-3. Usvajanje Radnog plana Komisije za vanjske poslove za 2007. godinu

Slavko Matić je na početku zahvalio članovima Komisije na ukazanom povjerenju, izrazio nadu i uvjerenje da će buduća suradnja biti plodotvorna i učinkovita i otvorio raspravu o 3. tački dnevnog reda.

Azra Hadžiahmetović je predložila da se u Radnom planu nađe i oblast koja tretira aktivnosti parlamentarnih Grupa prijateljstva, a ta problematika bi morala biti uređena odgovarajućim aktom. Istakla je značaj postojanja međuparlamentarnih grupa prijateljstva, jer se na taj način učvršćuju i personalne veze i podstiču bolji međusobni odnosi. Takav

akt se inače već duže vremena nalazi u parlamentarnoj proceduri i nosi radni naziv „Odluka o osnivanju i djelokrugu rada međuparlamentarnih grupa prijateljstva Parlamentarne skupštine Bosne i Hercegovine za bilateralnu suradnju sa parlamentarnim tijelima drugih zemalja“.

Milorad Živković je ovo potvrdio i rekao da je Kolegij Zastupničkog doma već započeo aktivnosti na usvajanju ovakvog jednog akta i konačnom formiranju Grupa prijateljstva PSBiH sa parlamentima drugih zemalja. Potom je informirao nove članove Komisije da je Komisija za vanjske poslove u prethodnom mandatu 2002.-2006. već u nekoliko navrata od Predsjedništva BiH tražila da dogradi, osavremeni i ažurira temeljni dokument koji čini programsku osnovu djelovanja BiH u oblasti vanjske politike, pa tako i Komisije za vanjske poslove Zastupničkog doma PSBiH, „Opći pravci i prioriteti u provedbi vanjske politike BiH“ iz 2001.godine. No, kako nikad do sada nije bilo nikakve reakcije na ovaj zahtjev, g. Živković je uputio sugestiju da se prema Predsjedništvu BiH ponovo uputi dopis u ovom smjeru. Predložio je i da se u Radnom planu u nekoliko naznaka navede i šta to Komisija za vanjske poslove nije, iz objektivnih razloga, uradila u prošlom mandatu.

Husein Nanić je postavio pitanje koliko je zapravo Radni plan Komisije ograničavajući u njenom radu i koliko Komisija može inicirati susrete sa parlamentarcima drugih zemalja, te istakao da je njegova želja da Komisija ima aktivnu ulogu u radu po svim pitanjima iz oblasti vanjske politike.

Slavko Matić se složio sa Huseinom Nanićem da je svaka inicijativa članova Komisije dobrodošla i da očekuje da će se na dnevnom redu sjednica Komisije naći tačke koje će redovito inicirati i članovi Komisije, a ne samo predlagači iz Predsjedništva BiH ili Vijeća ministara BiH. No, naglasio je da je Radni plan Komisije akt koji je općeg karaktera i koji ostaje otvoren za sve prijedloge i aktualnosti iz domena vanjske politike. Potom je predložio da se Radni plan usvoji sa primjedbama i prijedlozima Azre Hadžiahmetović i Milorada Živkovića.

Potom je Radni plan Komisije za vanjske poslove za 2007.godinu jednoglasno usvojen.

Ad.-4. Izbor delegacija Parlamentarne skupštine BiH u:

- a) Parlamentarnu skupštinu Vijeća Evrope,**
- b) Organizaciju za evropsku sigurnost i saradnju (OSCE),**
- c) Interparlamentarnu grupu BiH pri Interparlamentarnoj uniji,**
- d) Centralnoevropsku inicijativu (CEI),**
- e) Parlamentarnu skupštinu NATO-a**

sa prilogom u formi Radnog materijala Poslovnika o radu stalnih delegacija.

Sekretar Komisije za vanjske poslove Merdžana Iglica dala je uvodnu riječ o ovoj tački dnevnog reda. Naglasila je da nije u nadležnosti Komisije za vanjske poslove da bira članove u delegacije Parlamentarne skupštine BiH, niti da usvaja Poslovnik o radu stalnih delegacija. Obrazložila je da je uvrstavanjem ove tačke na dnevni red željela da se članovi Komisije više informišu o prijedlogu Poslovnika o radu stalnih delegacija i da daju svoje primjedbe ukoliko ih imaju na ovaj dokument koji je još u fazi pripreme.

Predsjedatelj Komisije je potom otvorio raspravu o ovoj tački dnevnog reda.

Azra Hadžiahmetović je rekla da je s pažnjom pročitala Prijedlog Poslovnika o radu stalnih delegacija i istakla svoje primjedbe, kako slijedi:

Član 13. «Ako stalna delegacija nije iz objektivnih razloga izabrana odnosno konstituirana ili kada su članovi delegacije iz bilo kojih razloga spriječeni da prisustvuju međunarodnom skupu, u tom slučaju međunarodnom skupu može prisustvovati sekretar delegacije.» Ona je izrazila svoje neslaganje sa ovim članom i uputila prijedlog da se ovaj član briše ili da se zamjeni drugim kojim bi Kolegij Doma određivao ko može prisustvovati međunarodnom skupu u slučaju spriječenosti članova delegacije. Odredba tog člana ne mora nužno da isključuje prisustvo sekretara delegacije na nekom međunarodnom skupu, ali Kolegij

donosi konačnu odluku o tome. Nadalje je gđa Hadžiahmetović navela da je u članu 3. Poslovnika nabrojeno koje delegacije iz PSBiH učestvuju u radu međunarodnih organizacija. No, kako je naglasila, Bosna i Hercegovina i njena Parlamentarna skupština je punopravni član Parlamentarne skupštine Vijeća Evrope, i ovu delegaciju, i po obimu posla i aktivnosti, i po njihovom značaju bi, po njenom mišljenju, trebalo na neki način izdvojiti. Dakle, u članu 3. bi se trebala izvršiti korekcija i navesti drugačija formulacija, kao i svega što slijedi iz člana 3. kada je u pitanju Parlamentarna skupština Vijeća Evrope. Gđa Hadžiahmetović je iznijela i stajalište da bi trebalo uvesti obavezu u radu Stalne delegacije u Parlamentarnoj skupštini Vijeća Evrope da svako zasjedanje Parlamentarne skupštine Vijeća Evrope bude i obavezna tačka na dnevnom redu Zastupničkog doma, jer, kako je rekla, ne tiče se samo članova delegacije rad PSVE, već i svih članova PSBiH. U tom smislu je predložila da se član 16. dopuni obavezom informiranja oba doma PSBiH svaki put kad se na dnevnom redu zasjedanja PSVE nađe BiH. Također je upozorila da u članu 7. stav 1. po kome „svaka stalna delegacija ima predsjedatelja, prvog i drugog zamjenika predsjedatelja, koji se biraju između članova delegacije“, to ne mora uvijek da bude slučaj, jer prema poslovniku PSVE, nacionalne delegacije su dužne imati samo predsjedatelja.

Milorad Živković je dao primjedbu da se u članu 4. stav 3. nakon riječi: „11 članova“ stavi tačka, a ostali dio rečenice da se briše.

Slavko Matić je primijetio da je i u članu 1. Poslovnika o radu stalnih delegacija svojstvo posmatrača i punopravnog članstva izjednačeno, te da bi, ukoliko bi se usvojio prijedlog Azre Hadžiahmetović, trebalo izmijeniti i definiciju iz člana 1. Zatim je zamolio sekretara Komisije da objasni proceduru usvajanja Poslovnika o radu stalnih delegacija.

Sekretar Komisije Merdžana Iglica je objasnila da Kolegij Sekretarijata usvaja Prijedlog Poslovnika o radu stalnih delegacija koji je sačinila Komisija za izradu prijedloga Poslovnika o radu stalnih delegacija, a potom će se o tom prijedlogu očitovati i PSBiH.

Nakon ovoga predsjedavajući je zaključio raspravu o ovom pitanju.

Ponovio je prijedlog Azre Hadžiahmetović da se član 13. briše ili da se zamjeni drugim kojim bi Kolegij Doma određivao ko može prisustvovati međunarodnom skupu u slučaju spriječenosti članova delegacije, njen prijedlog da se član 16. dopuni obavezom informiranja oba doma PSBiH svaki put kad se na dnevnom redu zasjedanja PSVE nađe BiH, i prijedlog Milorada Živkovića da se u članu 4. stav 3. nakon riječi 11 članova stavi tačka, a ostali dio rečenice da se briše.

Predsjedatelj je dao na glasanje prijedloge članova Komisije, i oni su usvojeni jednoglasno. Ti prijedlozi bi trebali da budu doprinos Komisije za vanjske poslove za kvalitetniju izradu Poslovnika o radu stalnih delegacija u PSBiH.

Ad.-5. Izvještaj o učešću Oružanih snaga, policijskih i državnih službenika BiH u operacijama podrške miru za period 1.3.2006. - 31.8.2006. godine - podnosilac: Predsjedništvo BiH i Vijeće ministara BiH

Na prijedlog predstavnika predlagача i predsjedatelja Komisije, rasprava o tački 5. i 6. dnevnog reda vodila se objedinjeno.

Ad.-6. Odluka o produženju mandata jedinica Oružanih snaga BiH za uništavanje neeksplozivnih ubojitih sredstava (NUS) u operacijama podrške miru «Iračka sloboda» - podnosilac: Predsjedništvo BiH

Uvodnu riječ o ove dvije tačke dnevnog reda dao je savjetnik članova Predsjedništva BiH za vojna pitanja Sifet Podžić, rekavši da je prisustvovao i sjednici Zajedničke komisije za odbranu i sigurnost BiH, koja je, pored Komisije za vanjske poslove, nadležna za oblast koju ovi dokumenti tretiraju. Pošto nije bilo zainteresovanih za raspravu o ove dvije tačke dnevnog reda, predsjedatelj je dao na glasanje Izvještaj o učešću Oružanih snaga, policijskih i državnih službenika BiH u operacijama podrške miru za period 1.3.2006. -

31.8.2006. godine, koji je jednoglasno usvojen. Potom je dao na glasanje Odluku o produženju mandata jedinica Oružanih snaga BiH za uništavanje neeksplozivnih ubojitih sredstava (NUS) u operacijama podrške miru «Iračka sloboda» koja je također jednoglasno usvojena.

Ad.-7. Obraćanje Ollia Rehna, evropskog komesara za proširenje, parlamentarcima BiH 16. marta 2007. godine

Predsjedatelj je istakao da je ova tačka dnevnog reda više informativnog karaktera, te otvorio raspravu o ovoj tački dnevnog reda.

Kako nije bilo zainteresiranih za raspravu, predsjedatelj je konstatirao da su članovi Komisije primili k znanju obraćanje Ollia Rehna parlamentarcima PSBiH kao informaciju.

Ad.-8. Izvještaj s Konferencije predsjednika komisija za vanjske poslove parlamenata zemalja članica Evropske unije, Evropskog parlamenta i zemalja kandidata za prijem u članstvo EU (COFACC), održanoj u Berlinu, 26. i 27. februara 2007. godine;

Uvodnu riječ o ovoj tački dala je Azra Hadžiahmetović. Podsjetila je članove da je ona prisustvovala ovoj Konferenciji umjesto predsjedateljke Komisije Borjane Krišto, koja je bila spriječena otići u Berlin. Obavijestila je članove da je materijale sa ove Konferencije dostavila Predsjedništvu BiH, Ministarstvu vanjskih poslova BiH, Direkciji za evropske integracije, te Kolegiju Zastupničkog doma PS BiH. Istakla je da je ovo veoma važna Konferencija na kojoj bi Komisija za vanjske poslove svakako trebala prisustvovati i ubuduće.

Predsjedatelj Slavko Matić je potom predložio da se prihvati Izvještaj sa ove Konferencije. Husein Nanić je dao primjedbu da bi se ovo trebalo nazvati informacijom, a ne izvještajem, i da bi članovi Komisije to trebali primiti k znanju kao informaciju.

Milica Marković se nije složila s Huseinom Nanićem, u prvom redu jer je Izvještaj koji je sačinila tajnik komisije Merdžana Iglica veoma cjelovit, sveobuhvatan i informativan, ali i zato jer je na početku sjednice dnevni red u kojem se navodi da je to Izvještaj, usvojen bez primjedbe. Naglasila je da ako u dnevnom redu stoji Izvještaj, onda se treba izjašnjavati o izvještaju, a ne o informaciji.

Azra Hadžiahmetović je napomenula da ukoliko sekretar ide na putovanje sa nekim od članova Komisije, onda on pravi izvještaj. I dodala je da bi ovaj izvještaj, zbog njegove važnosti, trebalo proslijediti i Kolegiju oba doma.

Slavko Matić je potom ponovo predložio da se Izvještaj prihvati, pošto niko od članova nema primjedbi na sadržaj. Dao je na glasanje Izvještaj s Konferencije predsjednika komisija za vanjske poslove parlamenata zemalja članica Evropske unije, Evropskog parlamenta i zemalja kandidata za prijem u članstvo EU (COFACC).

Izvještaj je usvojen sa pet članova za i jednim suzdržanim.

Kako je ovim iscrpljen dnevni red 4. sjednice Komisije za vanjske poslove, sjednica Komisije je završena u 13 sati.

TAJNIK
KOMISIJE ZA VANJSKE POSLOVE
Merdžana Iglica

PREDSJEDATELJ
KOMISIJE ZA VANJSKE POSLOVE
Slavko Matić

Kopija: MVP-u BiH